



Ajaccio, le 9 février 2011

## *Adesione di u SCB à a Cartula di a lingua corsa*

**Sabbatu u 12 di ferraghju – 8 ore di sera  
Furiani – Stadiu Armand Cesari**

Paulu Giacobbi, Presidente di u Cunsigliu Esecutivu di Corsica, et Julien Lolli, Presidente di u Sporting Club di Bastia, firmeranu a Cartula di a lingua corsa, u sabbatu 12 di ferraghju 2011 à u stadiu Armand Cesari di Furiani, in presenza di Petru Ghionga, Cunsigliere Esecutivu in carica di a lingua corsa.

### **A pulitica di a Cullettività Territoriale di Corsica**

In u quadru di a pulitica iniziata à prò di a lingua è di a cultura corsa, a Cullettività Territoriale di Corsica hà messu in ballu un Pianu strategicu d'assestu è di sviluppu di a lingua corsa.

U so fine hè di prumove a lingua corsa da liame suciale, arrulendu tutti l'attori isulani in u prucessu di sviluppu è di diffusione di a lingua in tutte e pratiche di a vita suciale.

Sta pulitica hè arrimbata à trè urientazione strategiche :

- salvà a tramandera di a lingua corsa à e nove generazione;
- definisce u postu è e funzione di a lingua corsa in a sucetà d'oghje ;
- définisce chì mezi è chì urganisazione accorrenu da sustene u sviluppu di l'usu di a lingua corsa in tutti i duminii.

Hè cusì chì a pulitica linguistica territoriale definisce dui acchisi di sviluppu :

- u prugettu educativu : Quaternu n° 5 « lingua è cultura corsa » di u PRDF, aduttatu da l'Assemblea di Corsica u 29 di ghjugnu di u 2006, chì tende à stallà u bilinguismu primaticciu francese-corsu per andà ver di u plurilinguismu ricummandatu da l'Europa ;

- u prugettu sucetale : « Pianu strategicu d'asestu è di sviluppu linguisticu », vutatu à l'unanimità da l'Assemblea di Corsica u 26 di lugliu di u 2007 ; u so scopu hè di favurizà l'usu di a lingua corsa in a vita suciale (pratica casana, usu amministrativu, usu in l'imprese, in i media, in i settori professionali, ecc.).

## **L'adesione di u Sporting à a Cartula di a lingua corsa**

In core di u prugettu sucetale, a « Cartula di a lingua corsa » hè stata iniziata da favurisce l'adopru di u corsu in e cullettività pubbliche, l'amministrazione, l'imprese è u mondu associativu ; cuncerna parechji dumiinii : a furmazione di i persunali, a cumunicazione esterna è interna, a signaletica, l'accolta di u publicu...

Dui documenti cumponenu a Cartula :

**1) « Principii è impegni cumuni »**, cuncerna tutti i servizii publichi, e cullettività locale, l'imprese, l'associi ; stabilisce u pattu firmatu da l'organismu aderente chì :

- ricunnosce chì, in Corsica, l'adopru di a lingua corsa hè naturale in a vita ecunomica è suciale è in u spaziu publicu, à paru à a lingua francese ;
- stima chì tutt'ognunu hà dirittu à una furmazione à a lingua corsa chì hè creatrice di leia suciale, d'integrazione è di sviluppu in a nostra sucetà ;
- stima di u so duvere d'impegnassi nu u pruceddu cullettivu chì permetterà di dà à a lingua corsa a dimensione propiu soia chì li vene in a sucetà.

**2) « Livelli di certificazione »**, hè specificu à e cumune è precisa l'azione à move per ogni livellu d'impegnu sceltu.

Pè l'imprese, l'associi o altri servizii publichi chè e cumune, si tratta di firmà u documentu « Principii è impegni cumuni » è di mette in ballu azione precise ispirandussu da quelle stabilite pè e cumune.

Oghje, firmendu a Cartula, u Sporting s'impegna pè cuntinuà l'azione ch'ellu hà digià iniziatu è pè mette in opera azione nove :

- Affissi è annunzi in lingua corsa
- Signaletica di u stadiu Armand Cesari
- Adopru di a lingua corsa in tutti i canti di i sustenitori
- Logò è messagiu « A lingua hè viva, ci tocca à parlà » nant'à e maglie di u club
- Corsi di lingua corsa pè i sculari di u Centru di furmazione di u club, è ancu pè i ghjucatori professionali
- Creazione d'un misincu bisilingu

Impegnatu decisu pè prumove sempre di più a lingua nustrale, u Sporting scumparte a mossa cumuna atta à dalli a dimensione propriu soia chì li vene in a sucetà.



## **A campagna di comunicazione pè a prumuzione di a lingua corsa**

Da u 2009, una campagna di prumuzione di a lingua corsa accompagna u dispositivu di a Cartula . I documenti s'addirizzanu à dui publichi differenti :

- **E famiglie**, da sensibilizalle à i benefizii di u bilinguisimu pè i zitelli
- **E cullettività locale è l'impresu**, da ch'elle s'impegninu in a Cartula di a lingua

Si tratta dinù di fà cunnosce è di scumparte a pulitica linguistica di a Cullettività Territoriale di Corsica.

L'arnesi di comunicazione :

- **un librettu d'infurmazione** : stampatu à 10 000 esemplarii, spiega à e famiglie u sistema d'insignamentu di a lingua corsa.
- **una scheda d'infurmazione** : Inserita in u cartulare individuale d'iscrizione in sesta, informa i parenti nant'à u dispositivu d'insignamentu in cullegiu. Hè cusì chì u numeru di sculari studiendu u corsu in sesta hè crisciutu assai, da 68 % à 83 % in 3 anni.
- **un librettu di presentazione di a « Cartula di a lingua corsa »** : Stu documentu s'addirizza à ogni tipu d'organismu signatariu (cumune, associi, imprese...). Presenta i scopi di a Cartula è a so messa in opera. In appicciu pè e comune ci si trova u riassuntu di l'azione ubligatorie da realizà à ogni livellu di certificazione.
- **un diploma** : Stu documentu accerta u livellu toccu da l'organismu signatariu compie ch'elle sò l'azione scelte.
- **Un fogliu di stampini** : sti stampini culuriti è piacevuli chì simbulizeghjanu u bilinguisimu, si ponu affissà in i lochi publichi da incuragisce l'accolta in lingua corsa è à so pratica.

\* \*  
\*